

Basef Ifimba Pol Nanda'ef Fagi' Fagafe'ma Timotii

Basef bandafi Pol nagi' nanda'ef fagafe'ma Timotii

1:1-2 Pol nanda' basefa Timoti ma God noloma Kraisi Jisas
mogatopalopana

1:3-2:26 Pol na'ipa Timoti ma nonda' maol Godi andeande' datima

3:1-17 Esis Kristen sundalutu banagesa sogame' akafimi nimaguf
akutaifi ma epes hiasi sogosambala basef Godi

4:1-8 Pol na'ipa Timoti dindinipa nowalipasa basef Godi datima
niganifelisa sonda' waf bu'wafi

4:9-22 Basefa Pol nanda' kot faloma basef akutaifi

1 ¹⁻²Ae' Pol anda' basef fafe'mago ina' Timoti, ae' okom
magamagailinai. Ina' nahapifa God dei' nataga nogame ae'inai.
Okom Godi atom dei' ape aposel Jisas Kraisi. Basef Kraisi endilisifi atif,
naso'apa ambal namili apa' magape sisihipama anini. Ae' a'i amom biam
motopalopena dowaf mowa' banagaina, ea' muti uwahipina monda'
nembel ine'imbili bepe sa'ombel.^a

Apa' ina ambagof awagofa basef Jisasi, owa'

³Esis ihase ae'asi saila waf Godi, dei' ae' wapani ailaf. Ea' malogol
gagape opaf ae' nomoni ina gihimba'me anef waf awafi anda'afi, owa'.
Beten ae'ani owamb alip dondol ae' okom mapomena anifela God. ⁴Ae'
okom mapoma ambif fagaluwi naep ine'ipi, okom mohafel a'owa' a'i
ata' efo'o itilina sonehe endilisi.^b ⁵Ae' okom mandanda'ma hapif ine'ini,
inimba endilisini, ina baso'amini, owa'. Hapif inimba fowa' nali' napoma
iha'mena ine'ikwi Lois kwaloma ma'mena Yunis. Ea' egawa endilisi,
hapif inimba dei' napoma ina' wapani.^c ⁶Fowa' ae' awamona lagofa
balaga ine'igai ma God nagase'ena hiahaom fasimi ananimi. Ea' dei' a'i

a 1:1-2 Ef 1:1; 1 Ti 1:2; Fl 3:5; Ap 23:1 **b** 1:4 Ap 16:1 **c** 1:5 1 Ti 4:14

esa'ma nomonas ine'isi ma okom mogapoma hiahaom amamba fasimi magapoma ine'i, si'i sugufapula nif fagandif lu'wif.^d ⁷Ambal bu'unai God nagaso'apanai ina nonda'apa ombal mogahapai, owa'atin. Anen naso'apa waf afamba mugalutu banagepamafi ma ukup pigapigaila anis daias mugumafi alop ape'ipi andeande'.^e ⁸Ina' owa'i ambal aola niga'ipasa basef Dembinai apa'inaia. Ea' owa'i ambal aola ae' wapania, owa'atin. Ae' anda' kalabusi, epen dembinai. Ina' nefa' banagami Godi ma banagena nefa' nimanimi nelome ogawalapa basef bu'wafi ananifi.^f ⁹God nofa'apa mutanimai mogape andeande'. Anen nofalapa amam nematawa ananipai atepa mogape be'epa hilili'. Ina okom mapoma waf bu'wafi apa' manda'afi nofalapa, owa'atin. Okom ananimi atom maimailapa nofalapa natopalopapa dowaf. Fowa' dambadamba ina dei' nanda' itap, ata' owa', Jisas Krai naso'apa okom apa' natopalopapa dowaf.^g ¹⁰Apa' dei' nogota ata'e Krai Jisas nafi'i nofa'apa motanima magape andeande'i, anen nataga alihina ea'. Dei' maol ananini God natopalopapa dowaf nogowa' banagapa ea' nataga alihin. Krai Jisas nikila' banagami magapoma ga'i, ea' basef bu'wafi Godi fihimba'mapa ambal lagape andeande' lifilafii.^h ¹¹Anen nali' nanda'e apoma maol inimba egawalapa basef fasifi ma epes hiasi. Ae' aposel God nasapa'e agawalapa basefi, ae' tisa dembiwai anda' maol Jisasi. ¹²Isimba atis dei' efa' akafimi amamba. Apa' ae' ina ambal aola amamba, owa'atin. Ae' egawa aman anamba agahapifanai. Ae' egawana endilisi anen banagonai ma nugumafi hiahaom hiami moloma epes hiasi ananisi hi'ilas ae' agaso'anas lagof ananigufi. Ea' isimba sope bo'wes andeande' sefe' sotagama nemaf afamba lu'wafi fegataga.ⁱ ¹³Basef ifimba fasifi hilili'i ina' ngame'emef malogol ae'agili, basef ifimba si'i anol ametal fasini ma nigihimba'mena waf fasifi negawalipa epesafi. Ina' nihapifa Jisas Krai endilisi ea' okom mimilana nenda' waf na'amba nihapila basef ifimba tatala'if.^j ¹⁴Nimafi basef ifimba bu'wafi endilisifi God nagase'enaef lagof ine'igufi ma nigimafiefi. Ambal bu'wali Godi nape nomona apa', notopalopena numafina ma maol inimba. ¹⁵Ina' negawa epes hiasi sagape itap lu'upa Asiai, saloma amom biam Figelusi Hermogenes sakwahowe safe'.^k ¹⁶Ae' andabetena Dembinai ma ata' nogati Onesiforus naloma wambota ananisi uwahipis. Dei' main, dondol nanda' okom ae'ami mape andeande'. Anen ina ambal aola ae' ape anda' kalabus, owa'atin. ¹⁷Anen nafi'i Rom nanda' maol lu'wani nala' nolaome, nagatolowe.^l ¹⁸Ae' andabetena Dembinai ma nogati anen uwahipina nemaf afamba lu'wafi. Anen natopalope nimaguf hiafi wambel ambalemba Efesus, isimba ina' negawas andeande' a'owa'.

d 1:6 Ro 8:15 **e** 1:7 Ro 1:16 **f** 1:8 Ef 2:8-9; Ta 3:5 **g** 1:9 1 Ko 15:55-57; Hi 2:14
h 1:10 1 Ti 2:7 **i** 1:12 1 Ti 1:10; 1 Ti 4:6, 6:3; Ta 1:9, 2:1 **j** 1:13 1 Ti 6:20 **k** 1:15 2 Ti 4:16 **l** 1:17 Ju 21

Ina' nepe si'i aman soldia bu'winai nanda' maol Kraisi

2 ¹Nogame ae'inai, dondol ina' nepe banagena ma Kraisi Jisas notopalopena dowafa banagami amamba nagaso' apa' magape sisihpama anini. ²Basef hiafi ina' name' agawalapefa nogohnaep epes hiasii, ifimba newalapefa anom amam gawaimi mogogawa basef andeande'i, ma muga'ipa anis daias datima.^m ³Ina' nendape banagena a'owa' si'i aman anamba soldia nindalutu banagena nindaila Kraisi Jisas. Nefa' nimanimi amamba neloma afa' anofa soldia ananifai ma maol inimba. ⁴Aman anamba nagape si'i soldiai, ina nahapila maol naninani, owa'atin. Nandanda' maol inimba soldiai fasini atina na'i dembinai soldia ananinai okom muga'i maol ananini.ⁿ ⁵Na'amba atin, aman ami nondopambema noloma anis nogasagihii, nondaila waf afamba esis sagasagihafi. Ama nikila' nogofa' hiahawes isimba fasisi sasagih sikila'ma sogofa'asi. Apa' anen i'i owa' nigi'ma waf afamba sagasagihafi andeande'a, atiasi ina nofa' hiahawes isimba, owa'atin.^o ⁶Aman nanda' maol lu'wani aofi ma nugumafaf andeande'i atiasi nili' nogofa' gwa'aisi aof afambai nikila' anis daias. ⁷Ina' okom mondapoma basef ifimba aga'iefi. Atiasi dembinai nondogamena okom ine'imi, ea' negawa basef ifimba hiafi kofagefa.^p ⁸Dondol ina okom mopoma Jisas Kraisi, anen naga' ea' notanima nosafel wapani. Anen wambota atamba Deviti, si'i aga'iasa basef bu'wafi Godi.^q ⁹Ae' awalapa basef ifimba fasifi. Isimba atis dei' sa'i ae' auwai, sase'e akafimi mamimami awami. Aho' sanda'e anda' kalabus wapani. Apa' basef Godi ina fanda' kalabus fape, owa'atin endilisi.^r ¹⁰Ea' ewa' banaga okom ae'anai ma egalutu banagewe dondol egatopalopa epes isimba God nogosaho'as ea' ananisii. Ae' a'i God notopalopa esisa nofa'as sogotanimai ma Kraisi Jisas soloma mogogala'i banagami magape lifilafii.^s ¹¹Apa' mundahapifa basef ifimba endilisifi sisihif. "I'i endilisi apa' a' maga' malomana, bola apa' mosafel mope namepa molomana wapani.^t ¹²Apa' i'i mope banagepama mogofa' nimanimi hiamima, anaf dao' mope si'i king dembipai molomana. I'i mogowa' alafugahana ma, anen wapani anaf nowa' alafugahapa.^u ¹³I'i apa' mi'i apa' alipipai milana, ma owa' mugailanai, basef ifimba ape'ifia, ea' apa' hapaipai. Apa' anen atona nagaila basef ananifi endilisi datimaii. Ina atiasi nokwahif nombaso'ma anen, owa'atin endilisi."^v

**Amom manda' maola God endilisii, agof amamugufi
fataga fandawalap naep Godi**

¹⁴Dondol ina' nesa'ma ukup asasipi ma basef ifimba. Ni'ipas banagambela naep Godi, ipa' ina pi'i basef pepa'ef pelomasa basef

m 2:2 2 Ti 1:8, 4:5 **n** 2:4 2 Ti 4:8 **o** 2:5 1 Ko 9:7,10 **p** 2:7 1 Ko 15:4,20; Ro 1:3
q 2:8 Ef 3:1,13; Fl 1:12-14 **r** 2:9 Kl 1:24 **s** 2:10 2 Ko 4:11 **t** 2:11 Mt 10:33 **u** 2:12 Ro 3:3-4; Nam 23:19; Ta 1:2 **v** 2:13 1 Ti 6:4; Ta 3:9

mamimami, owa'. Waf afambai ina fetopalopas kwasakwasala, owa'atin. Waf afamba atiasi fegahambombaga isimba sogame'afi.^w ¹⁵Ina' nenda' maol Godi banagambela negataga aman nanda' maol endilisii, ma ambal ine'ili ina aola maol inimba, owa'. Nenda'as na'amba ma God okom bo'oma ina' ma niga'i basef ananifi usi'if endilisi.^x ¹⁶Ina' nindihi'ama basef awafi. Ifimba ina basef Godi, owa'. Basef amambai atiasi monda' esis sogafe' ufia'w anamba aunai ma sogowa' alafugaha God.^y ¹⁷Basef asasifi awafi atif atiasi afetaga lu'wif si'i ilambeh awami, monda'as motaga lu'um endilisi. Tisa asasimi biam Himeneus naloma Filetus manda' waf afamba, maga'i basef mamimami wafimi. ¹⁸Amam amamba mololama basef endilisifi ea' ma'ias ma'i, "Apa' motanima mosafel ea', ina ata' motanima mosafel wapani, a' owa'atin."

Basef ifimba atif amom mahambombaga ukup banagapi anis sagahapifa Godi.^z ¹⁹Apa' dei' God nawa olaf banagafi ea', dei' fape. Olaf afamba anif amef failaf faga'i na'amba fa'i, "Dembina'i nogawa andeande'ma epes isimba ananisi." Ea' anif wapani fa'i, "Epes mamahisa saga'i agol Dembinaii, a' sondakwaha waf awafi."^a

²⁰Ipat lu'utai nomon dis amamba hiami esis sanda' kapa fasini gol o silva main mogogala'i sanda'ami. Apa' anom sanda' lawah sanda'am, anom sanda' itap sanda'am. Anom sanda'ama maol fasini, si'i sando gwa'aisi saga'as. Apa' anom sanda'ama maol awani falafini, sagala alapitami.^b ²¹Ea' dei' epen ami nekwaha waf afamba awafi ma nepe bo'wen hilili', inimba atiasi nepe si'i dis isimba sanda' maol bu'wani atinasi. Ea' Dembinai notopalopan nepe hilili' nenda' maol ananini. Ea' anin nendandombola nenda' maol naninani bu'wani hiani.^c ²²Dondol ina' nendafa'ma ukup amamba awasimi magataga ma amam amamba sa'umii. Nenda' maol bu'wani banagena nihapifa God nigaila waf usi'ifi feloma okom mogamogaila anisafi. Ea' nila waf opaf fogape sa'umbili, negaloma epes isimba opalef fagape bo'walef hilili' sogofala Dembinaii.^d ²³Apa' ina' newa' alafugama basef amamba mamimami awami dowadowafi ma epes isimba ukup magaso'asi gawa akasi. Dei' main, ina' negawa ea', basef ifimbai atif fagawalapa ukup mamimami wandafumi ma'i mandahihanamai.^e ²⁴Aman anamba nanda' maola Dembinaii ina ni'i anif basef wafifi nifitapef neloma anis, owa'i. Anen niti amam nematawa hiasi uwahipis noso'as opaf. Anen nondape dembinai tisa, nosopama okom numbutinai, nope nititi esis sonda'mana waf awafi.^f ²⁵Anen nuwalipas sa'ombel nisindi'amonas nimanisa epes isimba sondaiwa'manai sogosambala basef ananifii. Anen nonda' maol na'amba notopalopas,

w 2:14 1 Ti 4:6; Ta 2:7-8 **x** 2:15 1 Ti 4:7 **y** 2:16 1 Ti 1:20 **z** 2:18 Nam 16:5,26;
 Jo 10:14; 1 Ko 8:3; Ais 52:11 **a** 2:19 1 Ko 3:12 **b** 2:20 2 Ti 3:17 **c** 2:21 1 Ti 6:11
d 2:22 1 Ti 4:7 **e** 2:23 1 Ti 3:3; Ta 1:7 **f** 2:24 1 Ti 2:4

anaf sombema nelelemba sogogawa basef endilisifi andeande'. ²⁶Fowa' Satan nowalo'as isag ananigai, ma sagaila malogol ananigili. I'i esis sogawa basef ifimba endilisifi, bola ukup asasipi petaga alhip wapani ma sokwaha isag anamba Seteni sogafi'mai God.

Anef nemaf akutaifi atiasi waf aunai hianai naninani notaga

3 ¹Ina' nendegawa, atiasi nimaguf akutaifi nimanimi awami endilisi a' motaga. ²Nimaguf ifimba epes a' ukup pepoma esis atis, ea' ukup pindatiti moni mais asasisi a'owa', sosa'ma agof asisigufi atogof, sonda' du'waniga, sonda' epes findiwasa God. Ea' sosambala basef mamasasi ahasas asasisi. Ina atiasi sinifela Goda waf fasifi, a' owa'atin. Sosambala waf fasifi hilili'i. ³Ea' ina atiasi ukup pipila anis daias, owa'. Ina atiasi sokwaha waf awafi anis daias sanda'masafi, owa'atin. Atiasi esis ina ukup pese'asa migimigaha siga'i basef awafi, owa'atin. Ea' sonda'i'ipama anis daindaiasa waf awafi. Esis ea' ukup pi'i esis atis ina atiasi sumafi alop asasipi andeande', a' owa'atin. Sohambombaga epes isimba bu'wasi, sowa' alafugah sondaiwa'ma waf bu'wafi. ⁴Ea' sonda' alipisi asasisi sofe'ma lagof bousii. Ea' esis kwafalis sila waf awafi asasifi atef, ukup pepoma esis atis si'i dambesi. Ea' nomonas sisila dagala naninani aunai a'owa' ma alop asasipi atop. Ina ata' ukup pi'i God, a' owa'atin. ^h ⁵Epes isimba atiasi sohapila waf Godi alop atona asasinai ando' atogon, apa' ukup asasipi nomon sondaiwa'ma God sowa' alafugaha banagami ananimi. Ina' nindih'i'ama epes isimbai. ⁱ

⁶Anom amam amambai mandambaho' nimanis mafe' magi'ma nematawa awamba nomonas owa' sogapaowa andeande'ia mawis ifagw awaugwi, ea' mola'ata nomonas awausi. Nematawa awambai waf awaufi fanda' nomonas awausi nimanis a'owa'. Ea' ukup awaupi pesafema awami mamimami mahondo'awa. ⁷Nematawa awamba dondol wanda' maola ogofa' basef, apa' ina ogawa basef kofagefa endilisifi, owa'atin. ^j ⁸Fowa' Janisi Jambris manda' naumbih maloma Moses, mowa' alafugahana. Na'amba atin dei' epes isimba sanda' naumbiha basef endilisifi sowa' alafugahef. Ukup asasipi ea' aowasip endilisi a'owa', ea' hapif asasini sambaso'am atin. Esis ina sahapilif endilisi, owa'atin. ⁹Apa' waf afamba amamifi ina fataga lu'wif a'owa', owa'atin. Dei' main, atiasi epes hiasi siti waf gawa akafi amamifi si'i fowa' gani sagati waf afambai gawa akafi ma amam amamba Janisi Jambris manda'afi.

Ina' nihapila basef Godi tatala'if

¹⁰Apa' ina' nafe' nagaloma ae'i, nagame' basef ifimba aga'ipasef ea'i. Ina' negegawa fe' ae'anii, ma basef hiafi kofagefa ae'afi. Ina' negawa

§ 3:1 Ro 1:29-31; 1 Ti 4:1 **h** 3:4 Mt 7:15,21; Ro 2:19-20; Ta 1:16 **i** 3:5 Ta 1:11 **j** 3:7 2 Ti 2:25; Eks 7:11,22; 1 Ti 6:5

ae' ahapifa God banagewe, dondol a'ipasa basef ananifi sa'ombel, okom ae'ami ina wandafum, owa'. Ina' negawa ae' okom magamagaila anis daindaiasi, alutu banagewe efa' nimanimi.^k ¹¹Ina' negawa waf awafi hiafi esis sanda'meaf ae'i, ma akafimi amamba egefa'am walemb ambalemba wanelemb Antioki Aikoniam a Listrai. Ina' negawa hiahaom nimanimi sanda'meam egefa'ami. Apa' Dembinai natagwahowe ma hiahaom amamba hiami nimanimi.^l ¹²Aho', epes ami soloma Krai Jisas sisihis sogapani ma sogaila waf Godi, bousi asasisi atiasi sonda'as kwapete'as. ¹³Ea' amam awami maloma amom magambaso'ami atiasi mombaso'ma epes hiasi. Ea' aman anamba aunai nombaso'ma amom wapani. Ea' waf amamifi atiasi fetaga awef endilisi a'owa'.^m ¹⁴Apa' ina' nihapila basef ifimba nefa'ef nagahapilifi. Ina' negawa apa' amam nematawa mamahepama magawalipina basef ifimbai.ⁿ ¹⁵Ea' ina' negawa isimba wapani. Fowa' ina' ata' awani negawa gawa fasini ma Buk Baibel hilili'i ea'. Buk akwamba la'ifi'wi ma kogase'ena gawa fasini neloma nomonas fasisi ma ina' nigahapifa Krai Jisasa God notopalopena nofa'ena nigatambili.^o ¹⁶Ambal bu'unai Godi atona nasa'ma nomonas amom profeti manda' basef ifimba hiafi fagape Buk Baibeli. Basef ifimba fasifi ma fegaso'apa gawa, figihimba'mapa waf awafi ma mogakwahef, a figasindi'amona fe' ape'ini, figawalipapa ma mogolafa waf usi'ifi. ¹⁷Basef ifimba fanda'apa epes Godi banagepa la'ifipa endilisi, ma monda' maol hiani fasini ananini.

Ina' newalapef endilisi basef Godi

4 ¹Anaf Jisas Krai nowaloga epes hiasi dei' ata' sagape namisi, soloma isimba sagaga'i wapani. Naep Godi naloma Krai Jisasi, dei' a'ipina banagambel a'i Krai Jisas anaf notaga nondawalap alihina naep hiasii ea' nope Dembinai ma anamba anen nagala'ambemagoma. Isimba atis dei' a'ipina dindinip,^p ²Ina' ni'ipasa basef Godi atapina. I'i nemaf afamba esis sondandombola sogame' basef, dao' ni'ipasef. Apa' i'i nemaf mamahefa esis owa' sondandombol some'efa, ea' diamaso, apa' ina' ni'ipasef atin. Ni'ipasefa fegatalogofa basef ifimba baso'afi. Ni'ipas dindinipa sogakwaha waf afamba awafi asasifi. Ea' nefela ukup newa' banagas, niwalipasa waf awanafi sa'umbilifi atef.^q ³Anef nemaf fegataga, atiasi asondaiwa'ma sogofa' basef usi'ifi Godi, a' owa'atin. Ea' a' sila ukup asasipi atip sofa'ai anom tisa hiami asasimi, ma moga'ipasa basef ifimba esis isimba ukup pa'i sogame'ef aligah asasigahii.^r ⁴Ea' sowa' alafugaha basef endilisifi seme' basef amamba mamimami falafumi wafimi. ⁵Apa'

k 3:10 Ap 13:50; Ap 14:5,19; Sam 34:19 **l** 3:11 Mt 16:24; Jo 15:20; Ap 14:22 **m** 3:13 2 Ti 2:2 **n** 3:14 Jo 5:39; 1 Pi 1:20-21 **o** 3:15 Ro 15:4; 2 Ti 2:21 **p** 4:1 Ap 20:20,31; Ap 10:42; Ro 14:9-10 **q** 4:2 1 Ti 4:1; 2 Ti 1:13 **r** 4:3 1 Ti 4:7

ina' dondol nomonas sope sogawa alihisa nigimafi alop. Nemaf afamba nimanimi mogatagama nendape banagena nenda' maol newalapa basef fasifima esis amam nematawa sogololama Godi. Nenda' maol inimba ma negatopalopas, nenda'an endilisi hi'indalan.^s

Pol na'i, "Dei' maol ae'ani na'i ahi'ilan."

⁶Ina' negawa, nogota atamba atataga ma sehe egaga'. Esimbel ae'ambeli ba'i kolo'olambel belo sehe ega', ma indilali egaso' God. Nemaf fetaga ma ae' egakwaha itap apa'e.^t ⁷Ae' endepambema asagih afa' andeande'. Ae' ahapifa Kraisa banagewe, asagih andeande', dei' ataga alol.^u ⁸Dei' ametal hiahawes isimba sasagih sigikila'i sogofa'asi isimba sandandombol sapome. Ametal alamba na'amba. Atiasi Dembinai nofale ni'ipi ni'i, "Ina' aman nagape hilili'i."

Dembinai anen aman hilili'i nogawalogasi ma nemaf afamba. Nemaf afamba lu'wafi atiasi anen nese'e ametal alamba. Ea' ina neso' ae' atowe, owa'atin. Anen noso'asam isimba epes mamahisa ukup pipila anen notaga nondawalap sogatolonai.^v

Anif basef du'wanif

⁹Dei' ina' ulal nifi'mai ae' kwafalis.^w ¹⁰Dei' main, Demas okom ma'ima'i waf itapafi isimba atis a' nakwahowe nafe' Tesalonaika. Kresens nafe' itap lu'upa Galesia, ea' Taitus nafe' itap lu'upa Dalmesia.^x ¹¹Dei' Luk atona nape nalome. Ina' ne'wa Mak nolomena nifi'i nehapomeana. Dei' main, andeande'ma anen nogatopalope ma maol Godi.^y ¹²Ae' asapa' Tikikus nafe' Efesus.^z ¹³Ina' nigafi'i nifa'mai saket anamba launai anamba akwahona na'ihhi Troas ipat Karpusi. Anamba ina' nindifa'mianai. Ea' anom bukifah ae'ami wapani nifa'miami, buk amamba sanda' agwafih mafisim sanda'am sanda'awai. Awamba nindifa'miawai atin nifi'i endilisi.^a ¹⁴Aleksander aman nanda' brasi, nanda' megahahe endilisi. Anaf Dembinai nogwamana akafimi anen, mondahama waf anen nanda'meaf ae'i. ¹⁵Ina' wapani solawaina ma aman anamba. Anen natalogofa basef ifimba afa'ifi a'owa'.^b ¹⁶Ali' agwa basefa kot atamba esis sanda'meatai, ea' ina anin epen atitin nalutu nalome nemaf afamba natopalope, owa'atin. Epes ae'asi hiasi sakwahowe. Ea' andabetena God na'amba, a'i ina a' okom mopoma waf afamba awafi asasifi ma sagakwahowe nemaf afamba anda' kotefi, owa'.^c ¹⁷Apa' owa', Dembinai numafii ape ea' nase'e banagami. Isimba atis dei' awalapa basef fasifi a'if la'ifiwi endilisi ea' epes isimba hiasi owa' Judaisi sogogawa basef

^s 4:5 Fl 2:17 ^t 4:6 1 Ti 6:12 ^u 4:7 1 Ko 9:24-25; Re 2:10 ^v 4:8 2 Ti 1:4 ^w 4:9 Kl 4:14; Ta 1:4 ^x 4:10 Kl 4:14; Ap 15:37-39 ^y 4:11 Ef 6:21-22 ^z 4:12 Ap 20:6 ^a 4:13 1 Ti 1:20; Sam 62:12; Pro 24:12; Ro 2:6 ^b 4:15 2 Ti 1:15 ^c 4:16 Ap 23:11, 27:23; Dan 6:22

Godia, dei' same'ef hi'alas. Ea' God nelefate ma malogol mafin anamba lu'unai laion. ¹⁸Atiasi Dembinai nelefate ma waf afamba awafi hiafi esis sonda'meaf ae'i, ea' atiasi nofa'e itanima nohapone epe anamba God nagala'ambemagoma gani heven nugumafiasa. Ae' a'i banagami mogogala'i mondapaona dondol lifilafi. Endilisi.^d

¹⁹Ina' nese'ago dagala ae'ani ma Akwila noloma Prisila, ea' esis isimba wambota Onesiforusi.^e ²⁰Erastus ata' napani atin Korin. Ea' Trofimus aowas nanda'ana akwahona napani Miletus. ²¹Ina' ulal nifi'i kwafalis. Na'amba ina' nepomai nemaf afamba fufin lu'wani nagaluwafi. Yubulus naloma Pudens a Linus a Klodia esis alipisi Kristen isimba hiasi sanda'mepago dagala sandagalamago ina'. ²²Ae' a'i Dembinai nope nolomago ambal fasili ine'ili ea' notopalopepa dowaf nowa' banagaipago. Ea' ma'uf.

d 4:18 Ap 18:2; 2 Ti 1:16-17 **e** 4:19 Ap 19:22, 20:4